

Script of Evening Gojri News Bulletin 21 October 2024 at 1700 Hrs

ایوننگ گو جری نیوز بلیٹن مو رخہ 21 اکتوبر 2024

یوہ آکا شوانی جموں ہے اشفاق عظیم تے ظفر اقبال تیں خبر سُنو۔ پہلاں خاص خاص خبر۔

*1۔ لیفٹنٹ گو رنر منوج سنہا نے کہیو ہے جے پاکستان جموں کشمیر معصوم لوکاں نانہہ قتل کر غے امن خراب کر رہیو ہے تے انہاں نے ہسپتال پُج غے گگن گیر دہشت گردانہ حملہ مانہہ زخمی ہوا افراد غو حال چال جانیو۔

*2۔ جموں کشمیر غا نائب وزیر اعلیٰ سریندر کمار چودھری نے گگن گیر دہشت گردانہ حملہ غی مزمت کی ہے۔ تے انہاں نے کہیو ہے ہم جموں کشمیر مانہہ بہتر صورتحال خاطر کو شش کر رہیا ہاں۔

*3۔ نیشنل کانفرنس غا صدر ڈاکٹر فاروق عبداللہ نے کہیو ہے جے پاکستان سنگ تد توڑی کوئی بات چیت نہیں ہو سکتی جد توڑی وہ جموں کشمیر مانہہ معصوم لوکاں غا قتل عام نانہہ بند نہ کر دے۔ انہاں نے کہیو ہے ہم عوام غی خدمت، غربت تے مسائیل بارے کم کر رہیا ہیں۔

*4۔ تے وزیر اعظم نریندر مو دی نے کہیو ہے جے سرکاری ”اڈان“ سکیم نے بھارتی فضائی سیکٹر مانہہ تبدیلی آئی ہے۔

خبران غی تفصیل نال پہلاں اشفاق عظیم۔

LG Police Day

جموں کشمیر گا لیفٹنٹ گو رنر منوج سنہا نے گا ندر بل دہشت گردانہ حملہ غے اک دن بعد جس مانہہ 7 افراد ہلاک ہو گیا تھا اُس بارے گل کرتاں واں کہیو ہے جے پڑوسی ملک پاکستان اجاں وی کوشش کر رہیو ہے جے جموں کشمیر مانہہ امن و امان نانہہ کس طرح خراب کیو جائے۔ جناب سنہا نے پولیس نانہہ گا ندر بل دہشت گردانہ حملہ بارے تحقیقات کرن بارے کہیو ہے تانجے ہلاک ہون آلا افراد غا اہل خانہ نانہہ انصاف مل سکے۔ یاہ گل جناب سنہا نے اج سرینگر مانہہ پولیس شہدا غو تہاڑو منان غا اک پروگرام غے دوران کہی۔ جناب سنہا نے مزید کہیو ہے جموں کشمیر مانہہ منشیات غی روک تھام بارے حکمت عملی نال کم کرن غی لوڑ ہے۔ جناب سنہا نے شہید پولیس جواناں نانہہ خراج عقیدت پیش کرتاں واں کہیو ہے ان شہیداں نانہہ ہمیشہ یاد رکھیو جائے گو۔ ایل جی نے مزید کہیو ہے ہم سب نانہہ شہید جواناں شہادت غی عزت کرنی ہے تے کوئی وی ملک اُس ویلے تک ترقی نہیں کر سکتو جد تک جے اُس غی حفاظت نہ کی جائے۔

LG Visit

لیفٹنٹ گو رنر منوج سنہا نے اج سرینگر غا اک ہسپتال غو دورو کیو تانجے گا ندر بل مانہہ ہوا گگن گیر دہشت گردانہ حملہ مانہہ زخمی ہوا تعمیراتی مزدوراں غو حال معلوم کیو جا سکے۔ انہاں نے اُن غی صحت یابی خاطر دُعا کی تے حکام نانہہ ہدایت دتی جے وے متاثرین خاطر ضروری مدد نانہہ یقینی بناویں۔ ایل جی موصوف نے اک سماجی میڈیا پوسٹ مانہہ کہیو ہے تعمیراتی مزدوراں خلاف وحشیانہ حملہ غو جلد بدلویو جائے گو۔ جہیزو تا دیر یاد رکھیو جائے گو۔

LG Compenstion

لیفٹنٹ گورنر منوج سنہا نے اج پر نسیپل سیکریٹری چندراکر بھارتی نانہہ کہیو ہے جے گگن گیر دہشت گردانہ حملہ مانہہ شہید ہون آلا تمام افراد غی مالی امداد جلد توں جلد کی جائے۔ جناب سنہا نے اے پی سی انفرائیک کمپنی نانہہ وی کہیو ہے جے واہ بغیر کسے تاخیر غے ہلاک ہون آلا افراد غی مالی مدد کرے۔ اس سلسلہ مانہہ ایپکو انفرائیک کمپنی غا عہدیداراں نے جناب سنہا نانہہ جانکاری دتی جے ایس آر ای غے تحت ہلاک ہون آلاں گا اہل خانہ نانہہ 16 لکھ روپیاں غی مدد دتی جائے گی تے 15 لکھ روپیا فوری طور ور قدم چاتاں واں ایپکو کمپنی نے دستیاب کرایا ہیں جد کہ اس حادثہ مانہہ زخمی ہون آلاں نانہہ 2 لکھ روپیہ دتا جائیں گا۔ لیفٹنٹ گورنر منوج سنہا نے کہیو ہے سرکار تے ایپکو انفرائیک کمپنی ہلاک ہون آلاں غا اہل خانہ غی ہر ممکن مدد کرن واسطے وعدہ بند ہے۔

Dy CM Attack

جموں کشمیر غا نائب وزیر اعلیٰ سریندرکمار چودھری نے اج گا ندریل مانہہ ہوا دہشت گردانہ حملہ غی مزمت کی ہے۔ انہاں نے کہیو ہے ماضی مانہہ انتخابات توں پہلاں وی ایسا معاملہ دیکھیا گیا ہیں۔ انہاں نے کہیو ہے حالات غی بہتری خاطر کوشش کرنی چاہیے۔ انہاں نے مزید کہیو ہے لیفٹنٹ گورنر اور وزیر اعلیٰ نے دسیو ہے جے اس بارے سخت کارروائی کی جائے گی۔ نائب وزیر اعلیٰ نے مزید کہیو ہے ہم شہیدا ہوا افراد غا اہل خانہ خاطر دُعا کراں جے وے اس نقصان نانہہ برداشت کر سکیں۔

CM PCD

وزیر اعلیٰ عمر عبداللہ نے اج پولیس یا دگاری تہاڑا غا موقع ور زیوان سرینگر مانہہ اک تقریب غے دوران شہیداں نانہہ خراج عقیدت پیش کیو ہے۔ یاد رہ جے اپنی وزراء کونسل غا ارکان جاوید احمد رانا، جاوید احمد ڈار غے وزیر اعلیٰ غا مشیر ناصر اسلم وانی غے ہمراہ جناب عمر اس تقریب غی قیادت کر رہیا تھا۔ واضع رہ جے چیف سیکریٹری اتل ڈلو، پولیس غا ڈائریکٹر جنرل نلین پر بھات، ایڈیشنل چیف سیکریٹری جل شکتی شلین کابرا تے پر نسیپل سیکریٹری سمیت کئی سینئر عہدیداراں نے وی شہیداں نانہہ خراج عقیدت پیش کیو۔

Police Day Poonch

ضلع پولیس پونچھ نے اج قومی پولیس تہاڑو مناتاں واں ضلع پولیس لائین پونچھ مانہہ شہید جواناں غی یاد نانہہ تازہ کرتاں واں پریڈ کی۔ مہارا ضلع نمائندہ انوبھو مصری نے جانکاری دتی جے پونچھ غی شہیدی یادگار ور وی شہید جواناں نانہہ یاد کرن واسطے اک تقریب غو انعقاد کیو گیو تھو۔ اس تقریب مانہہ شہید ہوا جواناں گا اہل خانہ وی موجود تھا۔ قابل ذکر ہے جے اس پروگرام مانہہ ضلع ترقیاتی کمشنر وکاس کُنڈل، ضلع سیشن جج، پونچھ، ایس ایس پی پونچھ تے سابقہ ایم ایل اے وی موجود تھا۔ جن نے شہید جواناں نانہہ خراج عقیدت پیش کی۔ ایس ایس پی نے میڈیا سنگ گل کرتاں واں دسیو ہے گذشتہ سال 214 پولیس جوان شہید ہوا تھا۔

PM Police Day

اج پولیس غا یا دگا ری تہاڑا ور وزیر اعظم نریندر مو دی نے مُلک غا پولیس اہلکاراں غی بہا دری تے محنتی کا وشاں نانہہ خراج تحسین پیش کیو ہے۔ اک سوشل میڈیا پوسٹ مانہہ اُنہاں نے لوکاں غی حفاظت نانہہ یقینی بنان خاطر اُن غی انتھک کوششاں غی تعریف کی ہے۔ جناب مو دی نے انساناں نانہہ پیش آن آلی پریشانیاں غے پیش نظر پولیس اہلکاراں غی فعال کوشش تے امداد نانہہ سراہیو۔

یہ خبر تم آکاشوانی جموں تیں سُن رہیا ہیں خبراں غا باقی حصہ نال ظفر اقبال۔

Farooq Terror

نیشنل کانفرنس غا صدر ڈاکٹر فاروق عبداللہ نے اج گا ندریل گگن گیر دہشت گردانہ حملہ غی مزمت کرتاں واں کہیو ہے جے اس طرح غا حملہ کشمیر نانہہ پاکستان سنگ نہیں ملا سکتا۔ اُنہاں نے کہیو ہے جے اگر پاکستانی قیادت واقع ہی بھارت سنگ دوستی مانہہ دلچسپ ہے تے پھر اس طرح غا حملہ نانہہ بند کرنو وے گو۔ اُنہاں نے کہیو ہے کشمیر کدے وی پاکستان غو حصو نہیں بن سکتو۔ ذرائع نے دسیو ہے جے ڈاکٹر فاروق عبداللہ نے کہیو ہے پاکستان سنگ اس وقت تک کوئی بات چیت نہیں کی جا سکتی جد توڑی ہے گناہ غو قتل بند نہ کرے۔ جناب عبداللہ نے مزید کہیو ہے پاکستان نانہہ اپنو خیال رکھنو چاہیے تے کشمیر نانہہ کشمیریاں ور چھوڑ دینو چاہیے۔ اُنہاں نے مزید کہیو ہے ہم عوام غی خدمت، غربت تے مسائل غو خاتمو چاواں یا درہ جے گگن گیر حملو اس وقت ہوو جد کشمیر مانہہ دوڑ مانہہ حصو لین خاطر 2 ہزار اتھلیٹ موجو د ہیں۔ جن مانہہ 50 بین القوامی اتھلیٹ وی شامل ہیں۔

PM UDAN

وزیر اعظم نریندر مو دی نے کہیو ہے جے سرکار نے اڈان یعنی ”اڑے دیش کا عام ناگریک“ سکیم غے ذریعے بھارت غی ہوا بازی شعبہ مانہہ تبدیلی رونما کر دتی ہے۔ اڈان سکیم غی 8 وی سالگراہ منان غے پیش نظر جناب مو دی نے اک سماجی میڈیا پوسٹ ور کہیو ہے اس سکیم نے کروڑاں لوکاں اڈاناں مانہہ مدد کرتاں واں مُلک مانہہ ہوائی اڈاں تے ہوائی رستاں غی تعداد وی بدھانی ہے۔ جناب مو دی نے مزید کہیو ہے اس سکیم غی مدد سنگ تجارت کرن مانہہ مزید بابدو ہوو ہے جس سنگ علاقائی ڈھانچہ مانہہ وی ترقی رونما ہوئی ہے۔ وزیر اعظم نے مزید کہیو ہے اُن آلا وقت مانہہ حکومت ہوائی سفر کرن آلاں واسطے تے اس شعبہ مانہہ مزید بہتری لیان واسطے مزید کم کرے گی۔

HM Police

پولیس غا یا دگا ری تہاڑا ور وزیر داخلہ امت شاہ نے شہید ہوا پولیس غا اہلکاراں نانہہ خراج تحسین پیش کیو ہے۔ اک سماجی میڈیا پوسٹ مانہہ جناب شاہ نے کہیو ہے یوہ اک ایسو موقع ہے جد قوم شہید ہوا پولیس اہلکاراں غی روحاں نانہہ سلام پیش کر رہی ہے۔ یا درہ جے اج سویرے نوی دہلی مانہہ وزیر داخلہ امت شاہ نے پولیس یا دگا ری تہاڑا غا موقع ور قومی پولیس یا دگا ر ور پُھل چاڑے شہیداں نانہہ خراج عقیدت پیش کیو۔ اس غے نال وزیر مملکت برائے داخلہ بندی سنجے کمار، داخلہ سیکریٹری گو یند

موہن، خوفیہ بیورو غا ڈائریکٹر تین کمار ریکا تے نیم فوجی دستاں غا ڈی ڈی جیز نے وی اس موقعہ ور شہیداں نانہ خراج تحسین پیش کیو۔ وزیر داخلہ امت شاہ نے دسیو بے جے قریب 36 ہزار 4 سو 68 پولیس اہلکاراں نے ڈیوٹی غے دوران اپنی جاناں غا نظرانہ پیش کیا ہیں۔ اُنہاں نے مزید دسیو جے جاتے سال 2016 پولیس اہلکاراں نے اپنی جاناں غا نظرانہ پیش کیا۔ جناب شاہ نے دسیو جے گزری دھائی مانہ پولیس اہلکاراں غی کا وشاں سنگ جموں کشمیر تے شمالی مشرق غے نال نال دیگر علاقہ مانہ امن قائم ہوئے۔ جناب شاہ نے اپنا خطاب مانہ بولتاں واں کہیو جے سرکار غی طرفوں پولیس اہلکاراں تے اُن غا اہل خانہ خاطر بکھ بکھ فلاحی اسکیم وی چلائی جارہی ہیں۔ نال ہی اُنہاں نے کہیو جے بھارت نانہ 2047 توڑی اک ترقی یافتہ مُلک بنان خاطر وزیر اعظم نریندر مودی پُر عزم ہیں۔

Cameron India UNSC

برطانیہ گا سابق وزیر اعظم ڈیوڈ کیمران اج اُن عالمی لیڈراں نال شامل ہوا جہیڑا جے بھارت غی اقوام متحدہ سکیورٹی کونسل گا مستقل ممبراں واسطے حمایت مانہ شامل تھا۔ جناب ڈیوڈ نے کہیو جے دُنیا بھارت غی آواز نانہ سُننو چاوے۔ یاہ گل جناب ڈیوڈ نے اج اک نجی ٹی وی چینل نال نوی دہلی مانہ اک اجلاس سنگ خطاب کرن غے دوران کہی۔ جناب کیمران نے کہیو جے دوجی عالمی جنگ ہون توں بعد عالمی دُنیا پوری طرح بدل چکی ہے تے اج وقت غی ضرورت ہے جے اقوام متحدہ سکیورٹی کونسل مانہ بدلاؤ کیو جائے۔ اُنہاں نے مزید کہیو جے بھارت دُنیا غی بڑی معیشت آلا مُلکاں مانہ اج شمار وے۔

PM Summit

وزیر اعظم نریندر مودی غو کہنو ہے جے بھارت عالمی مستقبل غی تشکیل دین مانہ مدد کر رہیو ہے۔ جناب مودی نے کہیو ہے جے مُلک تمام شعباں مانہ بے مثال کم کر رہیو ہے۔ اک نجی میڈیا ادارہ غے ذریعے منعقدہ عالمی اجلاس سنگ خطاب کرتاں واں وزیر اعظم مودی نے کہیو جے جت تک دُنیا ہے واہ اس گل نانہ تسلیم کرے جے دُنیا غیر یقینی اے آئی اسپریشنل انڈیا مصنوعی ذہانت غا طور ور بھارت نانہ تسلیم کرے۔ جناب مودی نے مزید کہیو جے جس ویلے دُنیا غیر یقینی صورتحال مانہ کوئیڈ 19 غے وقت پھنسی وی تھی، اُسے وقت بھارت اک اُمید غی کرن بن غے دُنیا غے باتدے آہو تھو۔ وزیر اعظم مودی نے کرونا غا ویلا نانہ یاد کرتاں واں دسیو جے اُس بُرا وقت مانہ بھارت نے عالمی معیشت، مہنگائی تے بے روزگاری جیسا بڑا مسئلہ نانہ حل کر غے لوکاں نانہ راحت دین غو کم کیو۔ جناب مودی نے مزید کہیو جے این ڈی اے غی تیجی بار سرکار بنن نانہ اجاں صرف 125 تہاڑا ہی ہوا ہیں جس مانہ سرکار نے 9 لکھ کروڑ تین متی رقم غو ڈھانچو تیار کرن غی منظوری دین توں علاوہ 15 وندے بھارت ریل گڈیں مُلک واسطے دے دتی ہیں۔ اُنہاں نے مزید دسیو جے مُلک مانہ 8 نواں ہوائی اڈا بنان غو کم شروع کرایو ہے۔ تے 5 لکھ کہراں غی چھتاں ور سورج غی روشنی سنگ تیار ہون آلی بجلی غی پلیٹ وی دتی ہیں۔ جناب مودی نے کہیو جے این ڈی اے غی سرکار بنن توں بعد مُلک غا بیرون ممالک مانہ جمع پیسہ بدھ غے 7 سو بلین ڈالر ہو گیا ہیں۔ جناب مودی نے کہیو جے بین القوامی اسمبلی ٹیلی کام تے

ڈیجیٹل مستقبل بارے وی گل بات کرے گی۔ جناب مودی نے کہیو جے اس غی تقریب
نہ صرف اک تقریب ہیں بلکہ ملک غا لوکاں واسطے اُمید غی کرن ہے۔

GOC Rajouri

وائٹ نائٹ کور غا جنرل کمانڈینگ افسر لیفٹنٹ جنرل نوین سچدیوا نے اج راجوری ضلع
غا بالائی علاقہ تھنہ منڈی مانہہ حفاظتی معاملات بارے جائزہ لیا۔ جنرل موصوف نے
جی اوسی، سی آئی ایف رومیو غے ہمراہ تھنہ منڈی سیکٹر مانہہ پیر پنجال رینج غا
بالائی علاقہ غو دورو کیو تا نجے حفاظتی صورتحال غا جائزہ لیا جا سکے۔ اُنہاں نے
مزید کہیو جے خطہ غی سلامتی خاطر مہارا فوجی جوان بڑی لگن نال کم کر رہیا ہیں۔

اس غے نال ہی خبراں غو یوہ بلیٹن ختم ہوؤ۔